

Ils Fränzlis da Tschlin en la Tonhalle a Turitg

Il concert culminant a la «Stubete am See»

DA CLAUDIA CADRUVI / ANR

■ **Berlioz e Brahms, Strauss e Stravinsky daudan ins per il solit en la Tonhalle a Turitg. Ma la proxima fin d'emna pon ins tadlar là insatge tut auer: Ina cumposiziun da Domenic Janett. Igl è in'ocasiun unica.** Sonda e dumengia ha lieu la «Stubete am See». Pli che ventg producziuns da musica populara stattan sin il program. Ils concerts han lieu al Bauschänzli ed en la Tonhalle a Turitg. Igl è in program pulpi ed ex-

quisit per amatur da musica populara. In punct culminant: Aposta per quest festival ha *Domenic Janett* fatg ina cumposiziun che vegn dada en la Tonhalle. Il toc sa numna «Das Ländlerorchester», va quaranta minutas e vegn sunà dals Fränzlis da Tschlin ensemen cun set musicists da professiun.

Arpet e tibia en duet

L'idea ha Janett gi avant circa diesch onns – far ina cumposiziun per in orchester da musica populara. Per il solit

sunian adina ils medems instruments ensemen en ina grupp, explitgescha Janett. Per exempel la clarinetta cun l'accordeon u l'arpet (Hackbrett) cun la violina. Ma el haja ina giada vuli cumponer in toc per tuts instruments da musica populara, uschia ch'era l'arpet e la tibia sunian ina giada en duet. Quai saja nunusità.

Lura ha Janett obtegnì in contribuiziun dal chantun Grischun ed ha uschia gi temp da cumponer. El ha fatg in toc da radund quindesch minutas per in en-

tir orchester da musica populara. Il problem è dentant stà: Co organisar in tal concert, co rabagliar ensemen la gliעד, e cun tge daners pajar? La cumposiziun è perquai restada in bel temp en chaschutta fin che Janett ha raquintà ad in clarinetist da la Tonhalle da sia idea. Lez è stà inchantà ed ha gidà a metter en pe l'orchester.

In zitg sinfonia ed ina presa jazz

Cura ch'igl è stà cler, tgenins musicists che sunan, è Janett puspè sa mess a la scrivania ed ha sviluppà enavant la cumposiziun. Per part ha el cumponì passaschas aposta per ils singuls musicists. Il toc consista da differentas melodias, ed

el cumenza sco ina sinfonia. I dat passaschas per tuts instruments e parts nua ch'i vegn sunà en duet. Tranteren hai sequenzas ch'ils musicists dastgan improvisar e nua che la musica populara fa enconuschientscha cun ils ritems da jazz.

Gia l'onni passà è vegnì manà si ina cumposiziun da Janett cun in orchester da musica classica. Quai era dentant in toc bler pli curt. Perquai è la primaudiziun da la sonda proxima puncto dimensiun, lunghezza e stil insatge singular per il musicist e cumponist da l'Engiadina. Era per il public vegni ad esser in novum, pertge ils amatur da la musica populara èn disads ch'ils tocs cuzzan be paucas minutas. Janett è fitg spannegià co ch'il public reaghescha.



Set musicists professiunals ed ils Fränzlis furman l'orchester da musica populara.

FOTO J. MENOLFI

Trais producziuns cun dudesch musicists da vaglia

La cumposiziun da Domenic Janett e d'udir trais giadas: La proxima sonda e dumengia a Turitg ed ils 20 da settember al «Echos-Festival» a Son Gagl.

En l'orchester da musica populara sunan ils Fränzlis ensemen cun set musicists da professiun. Ils blers han las ragischs en la musica populara, ma singuls vegnan era dad autras spartas musicalas. Qua ils nums ed ils instruments: *Noldi Alder*, *Men Steiner* e *Johannes Schmid* a la violina, *Madlaina Janett* a la viola, *Gallus Burkard* e *Curdin Janett* al cuntribass, *Domenic Janett* a la clarinetta, *Florian Walser* a

la clarinetta Es/B, *Dani Häusler* a la clarinetta ed a la bass-clarinetta, *Heinz Della Torre* a la trumbetta e tibia, *Duri Janett* al cornet, *Lorenz Rath* a la tibia ed al corn, *Noldi Alder* a l'arpet, *Markus Flückiger* al Schwyzerörgel e *Curdin Janett* a l'accordeon.

Las producziuns a Turitg han lieu ils 30 d'avust a las 18.00 ed ils 31 d'avust a las 16.00 en la Tonhalle. Ils Fränzlis sunan anc uschiglio duas giadas durant la «Stubete am See».

Il program detaglià: www.stubeteamsee.ch.

La produziun a Son Gagl ha lieu ils 20 da settember a las 18.00. Dapli sut www.echos-festival.ch